



kat.komp.

9838


I Mon. St. B. P

2 H.

1888. IV. 153.



Biblioteka Jagiellońska



stdr0004888

Collegij S. J. Viena Carolo scriptus

HISTORIA BARBARICA, SIVE

Irruptiones BARBARORUM
in Germaniam, Galliam & Italiam,
ATILA DUCE.

Excellentissimo ac Illustrissimo Domino,

DÑO JOANNI
HARTVIGIO,

Sac: Rom: Imp: COMITI de Nostitz,
Domino Hæreditario in Falckenau, Dño in Hein-
richsgrün Tſchocha, Litmitz, Packmerschitz, Sahr, & u-
trumq; Dürmitz, Sacræ Cæsareæ, nec non per Hungariam
& Bohemiam Regiæ Majest: Actuali Intimo Consilia-

rio, Camerario, & Supremo Regni Bohemiæ

CANCELLARIO, &c.

Patrono Colendissimo, dicata

A

*Laurentio Joanne Rudawski, Ecclesiarum Ca-
thedralium Olomuc: & Varmiësis Canonico.*

OLOMUCII, Ex Typographia Viti Henrici Ettelij.

BIBLIOTHECA
VNIV. IAGELL
CRACOVENSIS

9838I

EPISTOLA DEDICA- toria ad Eundem.




*Tistes ac miseros aliquando Euro-
pæ Populos, Excellentia Tuæ sisto,
Magne & InclYTE COMES. Hor-
ret calamus iterum sanguine flue-
re, dum tot cladium argumentum repetit. O tem-
pora deslenda magis, quam narranda, nisi ad e-
xemplum rerum futurarum faceret, conuersi ac
conuulsi aliquando Orbis imaginem intueri. Fe-
roces ac barbari fuerunt illi, qui è Scythia olim
profecti, immanitate suâ terruerunt Mundum,
prompti nunc eundem occupare, nisi in tempore
conspirent Christiani, accurrant Principes, pu-
gnent sine discrimine omnes. Quicquid Asia,
& ipsa Græcia olim timuit, nunc occupata in nos
effundit. Auditur funestum Barbari Classicum,
quo reliquæ Europæ, ac nobis omnibus & singulis
exterminium minatur, & nos interim, serò eheu!
serò nimis in bellum consultamus! quasi Æthiopes*

inter se belligerarent aut Novi Indi: cum tamen
in visceribus nostris hareat hic Tyrannus divitijs
immensus, Religione hostis, non minus savus si
vincat, quam potens si vincere velit. Paratus
nunc florentem subjugare Germaniam, mox sin-
gulos per partes aggrediens, truncare Italiam,
quassare Galliam, affligere Hispaniam, decipere
Poloniam, pessundare Daniam, Sueciam, &
Angliam: nisi hec omnia Regna invicem juncta
nunc tandem serò licet nimis sapiant, ac sibi con-
sulant, aliàs ridente Tyranno ad nostrorum di-
scordias; brevi, brevi plorabit Italia, ululabit
Gallia, peribit Germania cum vicina Polonia!
Et tunc tempus erit, quale non fuit antea. Vale
Excellentissime COMES, ac mihi umbratico
fave homini Tuo Clienti, qui est, & donec vita
suppetet erit.

Excellentiæ Tuæ

Servus humillimus

Laurentius Joannes Rudawski,
Eccl: Cathedr: Olomuc: Canon.



HISTORIA BARBARICA,

SIVE

De Irruptionibus Barbarorum
in Germaniam, Galliam, & Italiam,
ATILA DUCE.



Ostquam è fastigio suo declinare Romani Majestas nominis coepit, nonnisi strage & ruinâ ad exitium præceps provoluta est Europa Nostra. Etenim Anno Christi Quadringētisimo Nono, Atila Mundizici Filius, Magni Nembrothi Nepos, Engadix natus, Rex Hunnorum, Medorum, Gotthorū, & Davorum, Metus Orbis, Deiq; flagellum, Quingentis Armatorum Millibus congregatis, Arderico, Valemiro, Theodemiro, Vindemiroq; Ostrogottis Principibus comilitonibus; Marcomannis, Svevis, Quadis, Erulis & Thuringis subjugatis prius Populis, mox

lis, mox Germaniam tanto furore aggressus est, ut à Danubio ad Rhenum, à Rheno ad Rhodanum ante pervenerit, quàm venire nuntiaretur: more fulminis, quod simul ac percutit, abit. Primum hujus Ducis furorem excepit Constantia Civitas tunc Germaniæ munitissima, quam vix obsessam expugnavit Tyrannus, Sigismundo ejus tunc Regionis Principe, non sine magna suorum strage fuso fugatoq; . Constantiam mox Basileæ expugnatio subsequuta est. Ac tandem Argentina urbium ejus temporis fortissima, Regni Arelatensis Caput, crudeli Duci in spoliū, cessit superbum; acri illa obsidione circumventa, etsi nullo munitionis genere careret, ita diu noctuq; admotis undiq; machinis quassata fuit, ut tandem succumberet. Quam direptam, dirutis moenibus, barbaro nomine Polyodopolim edixit appellari, indictâ capitali mulctâ in victoriæ suæ monumentū, ne quâ ex parte quassa moenia refarcirentur. Eo modo hostili ferro Urbs Argentina Regni Arelatensis caput tunc perierat. In Rhemeneses castra deinde moverat Atila, quos tantâ vi aggressus fuerat, ut non ante cessaverit pugnare, quàm vicerit pulcherrimâ Urbem; tantâ in Oppidanos commissâ cæde, ut nulli ferè evaserint, nulla templorū, nulla ætatis, nullâ sexūs habita ratio: religio & pietas cum humanitate videbatur extincta. Nicasius ejus Urbis Pontifex cum Eutropia

tropia germana Sorore, hostili ferro ambo sanctissimi Martyres cecidere. Inde Lugdunum ventum est, ubi Araris Rhodano sociatur, quæ etiam Civitas pari Hunnorum ferociâ oppugnata, direpta tandem est. Mox Rhodanum festinatis itineribus transiens impius Dux, Viennenses, Valentinianos, Avenionensesque, ac cæteros Rhodani accolæ diripuit & excidit, non sine Orbis admiratione ac repentino timore, tantæ enim cladis vix nuntius evasit. Tunc primum vires & arma in hostem totâ Europâ decem Occidentis regnantes moverunt Reges. Advolaverat & Eccius summus belli Dux, cum flore juventutis Italicæ; Aderat Gotthorû Rex Theodoricus, Militum Trecenta & Viginti Millia: quæ ubi in Catalaunicis sub Tolosa convenerant campis, mox Deo ac prælio rem dirimentibus, Victores evaserunt, desiderato nihilominus Theodorico in loco pugnæ, Gotthorum Rege, hoste Atilæ atrocissimo, quem universus exercitus pro debito luxit. Cæsa tunc ab utrinque Centum Sexaginta Quinque Millia, Historici, prodidère. Et certè nobilis tunc de Barbaro hoste relata fuisset victoria, si Eccius qui vincere sciverat, victoriâ uti scivisset. Sed ille dimisso Exercitu, auxiliaribusque copijs paulò post dilabentibus, Atilæ victo præbuit occasionem, universam Galliam, Regnorum ut sic dicam Regnum, cædibus, incendio, & rapinis

pinis affligendi, ac mox pulcherrimam evertendi Italiam, ad quam diu anhelaverat Barbarus. Domitis etenim Romanorum viribus, faciliè totius Orbis Terrarum Imperio potiturum se sperabat. Hinc ex Gallia traducto prius in Pannoniam Exercitu, ibidemq; pro tempore aucto, per Dalmatiam ac Illyricum Italiam ingressus eandem occupat, Salonam urbem tunc fortissimam, Populi Romani nobilissimam quondam Coloniam penitus eversam; Cujus oppugnationem æternam memoriâ dignam, genuinis hinc adnecto verbis, quam Antonius Bonfinus Rerum Hungaricarum fidelissimus Scriptor, Decadis 1. Lib: 6. ita describit. *Nondum ex Urbe Corona pedem moverat Atila, cum Salonam nobilissimam Populi Romani Coloniam, gravi obsidione imperat obduci, cujus vestigia ea supersunt, ut quanti momenti Urbs illa fuerit, haud difficulter ostendant. Vix tribus millibus passuum à mari remota, in planitie sita, interfluente flumine dividebatur, opulenta nimis & fecunda, quando Dalmatarum celeberrimum semper hæc fuit Emporium. Munitam Urbem forti animo Hunni aggrediuntur, varia manibus tormenta admovent, turres ac vineas pars adhibent. Multi allatis scalis circumveniunt, arietibus plerique mania quaterere, portis alij admoveere testudines, ceteri muros diversis artibus oppugnare. Contra*
Oppi-

Oppidani instare fortius, dicere nullam deditionem
sperari oportere, se à Romanis oriundos, adversus
Barbaros, Romanâ virtute certaturos, adhac satis cõ-
meatum habere, neque inediâ, neque siti defuturos.
Contrâ his verbis Atula irritari, ut aut ibi totum exer-
citum perdere, aut Urbe potiri statuerat. Quare ter-
tio die iterum pugna signum dat, fossam cõpleri jubet,
aggerem quoq; proteri, ut sine impedimẽto mania cuiq;
adire liceat, mox turres, arietes, ceterasq; machinas
propius ad moveri, ad urbis portas sigillatim castella
erigi, quibus oppidanos à manibus repellant, qua ad
octavam usq; contignationem extulerat. Qua omnia
ubi facta sunt, urbem undiq; invadunt, pars mania
conscendunt, reijciunturq; instantius ab oppidanis;
pars adaclâ testudine muros suffodiunt, ad motis multi
machinis mania quassa diruunt, aditumq; urbi pate-
faciunt; alij sese ingerere student, in manibusq; ca-
duntur. Contrâ Oppidani resistere fortius, & obsti-
natus in ruinis urbis cadere, alij reclinato hoste, fumo
& egestâ terrâ obstruere aditus, obijcere vasa vina-
ria completa saxis. Ubique clades miserrima oritur,
utrinq; cadunt homines, hinc multi à manibus detur-
bati, aut saxorum ruinâ collisi, illinc supra mania sa-
gittis jaculisq; confossi, quin & multi urbem ingressi
continuo obtruncati sunt. Nam in media urbe prae-
dium

dium collocârant, unde laborantibus dato signo, è vestigio succurrebant. Item mulieres saxa, conflatam picem, ac sulphur cum aqua ferventissima circumferre, adjuvare viros, præterea hortari, ut pro Patria ac liberis, pro Aris & focis obnixius dimicet: nil pluris æstiment, quàm pro Patria mori. Præterea illæ plerumq; virorum supplementum esse, & in demortuorū loco se ultro sufficere, pars earum securi, nonnulla saxis deturbare subeuntes. Harum operâ subsidioq; Oppidani ita confirmati sunt, ut hostem undiq; dejecerint. Atila militem ab oppugnatione revocat, ne suorum stragem augeat. In quo prælio Hunnorum duo circiter millia desiderata, ex Urbanis vix cecidere centū. Multi utrinq; saucij, cives curatis aliquantisper corporibus, vigilias ubique disponunt, stationem quisque suam repetit, diruta mania aggere alto resarciunt alij. Alij ut tutius Urbem protegant, interiore fossâ valloque Urbem circumveniunt, crassoq; intus aggere muniunt, ut si forte mania deseruerint, intro sese referant. Quibus certum erat, aut obstinatissimè Patriam tueri, aut si quâ fati iniquitate cogantur, cruentissimam hosti victoriam relinquere. Atila reficiendi ac recreandi spatium Oppidanis, sibi calamitosissimū fore ratus, quandoquidē hinc victoriam differri, ac suorum eadem augeri intelligebat, consilium init, assiduā urbem op-

hem oppugnatione sollicitare, & modò eludere, modò
acrius infestare decernit, ut negatâ quiete laboribus
pariter & vigilijs conficiantur. Quin etiam pro vi-
rili parte, sumendi cibi spatium abnegare studet, quod
præ nimia gentium multitudine facile poterat, quare
in sequenti die perpetuū Urbi pralium indicit. Clām
Præfectos cohortiū admonet, ut datis vicibus pralium
ineant, die oppidanos eludant ne respirēt, noctu verò
gravius adurgeant. E compositò pugnam ineunt, à
principio, quacunque possunt arte, vehementer infe-
stant, post quintam horam alij succedunt, pugnam red-
integrant, pari arte ad vesperum usque dimicant. In-
gruente nocte alij continuāt, acerrimè oppugnant, per
tenebras eludebantur ictus, & quandoq; ex insperato
inferebantur. Sub mediâ nocte pralium instauratur,
ingenti utrinque clamore pugna conseritur. Oppidani
saxa trabesq; devolvunt, cū pinnis murorum hostes
appropinquare cæperint, alios securibus è muro detur-
bant, strages instauratur. Oppidani continuâ pugna,
inediâ defessi, aliqui cedere cæperāt. Contrâ isti ma-
niâ conscendere, quod ubi in tribus quatuorvè locis
factum fuit, cessere sensim illi, & intra secundâ mu-
nitionem se recipiunt. Contrâ illi à tergo instare, &
dūm eos prosequi student, in cacâ fossam cadere, unde
se redimere non facile poterant. Innumerabilis mul-

titudo interiorem fossam compleverat, quam oppidani
saxis telisque confodere aggrediuntur, quod ubi à suc-
cedentibus intellectum est, ad lucem usque è muris pu-
gnatum, quando isti spe potiunda urbis perciti acruis
instare, contra illi desperatâ salute obstinatius resi-
stere. Illucescente die Rex mania conscendit, quod ubi
ab universo spectatum est Exercitu, innumera undique
multitudo confluit, cujus agmine non modò completa
fossa, sed æquatus agger, alius super alium urbem in-
gredi contendit. His igitur agminibus obruta Civi-
tas, utriusque sexus cede completur, passim diripitur,
Et nobilia Civium Romanorum edificia diruuntur,
neque templis quicquam concessum Et aris. Civium
fortune aut præda abacta, aut igni sunt absumpta. De-
curiones omnes, ex edicto ante conspectum Atila
in foro caesi. Nemo ex Urbe vitâ donatus est. Non in
Salonenses, sed in Romanos ibi tunc sævire Atila vi-
debatur. Eoque magis exultabat Hunnus, quò superbi-
ora Romana gentis edificia subverteret.

Ita tunc solo æquata est Salona, cujus nunc vix ru-
dera extant, aut campi tantum ubi Salona fuit. Sa-
lonæ excidio territæ reliquæ Italiæ Civitates, passim
Victorem Atilam admittebant, ab illo vicissim mi-
litibus in prædâ datæ, donec ad Aquileiam ventum
esset, quam Urbem triennio obsessam, Ciconiarum

infe-

infelici augurio ex Civitate certatim migrantium,
tandem expugnaverat ac deleverat Barbar⁹. Eversâ
Aquileiâ, ita omnium Italarum animi consternati
fuere, ut pro manibus hostem instare reputarent;
Hinc cum Aquileiense excidium pleno Senatu rela-
tum esset, omnes usque adeo exanimavit, ut vitâ de-
functis invideretur, qui ex his malis Divinâ commi-
seratione, prærepti videbantur. Silentium deinde
cum gemitu singultuq; aliquandiu celebratum, do-
nec Valentinianus Imperator, dissimulato parum
metu, ne cæterorum, exemplo suo, animos conster-
naret, rogare singulorum sententias cœpit. Pauci
censuere, quando nemo præ dolore verbum profer-
re poterat. Tandem è Senatusconsulto statuitur, an-
te omnia Deo Optimo Maximo supplicationes fie-
rent, delectus militum per Italiam ac Germaniam
summâ celeritate haberetur, ingensq; totâ Europâ
conscriberetur Exercitus, sed tardè hæc omnia con-
sulebant. Etenim Atila eversâ Paduâ, occupatâ Fer-
rariâ, Vicentiâ, Veronâ, Pergamo, Como, Brixîâ,
Mediolano, ac Papiâ, etiam pulcherrimæ urbium,
Urbi funestum excidium parabat, nisi LEO Sanctiss;
Pontifex, à Cæsare Valentiniano, totoq; Senatu Ro-
mano exoratus, ad Atilam legationem magno ani-
mo suscepisset, eumque à diripienda Divini Imperii
Sede avertisset, constans etenim Historicorum fides
est,

est, peroranti tunc Leoni Pontifici adstitisse duos senes, qui demissâ barbâ, ac venerando horribiliq; vultu, nisi legato paruisset, præsentē infestis gladijs mortem Atilæ minabantur. Petrum & Paulum suo tunc Vicario præstò adfuisse creditum est, Leo impetratâ totiûs Italiæ salute, immortales Deo gratias egit, Romamq; reversus publicam Ecclesiæ liberationem retulit. Paulò etiam post Atila redux ex Italia, dùm in Pannonia triumphat, de subjugata, incensa, ac direpta Europâ, ac novos iterùm in Asia & Africa somniat triumphos, moritur; sed non in tempore, tardè enim subsecutus est miseros illos, quos ante se præmiserat. Referam hîc pro coronide gestorum Atilæ, Mediolani deditionem ac direptionē, haud indignam, quam posteritas relegat, ac barbaris tandem aliquândo in fine mundi, fidere dediscat. Postero die ad Atilam Legatos Mediolanēses mittunt, qui Senatûs Populiq; auctoritate deditionem, ut clementiorem hostem inveniat, his genuinis honorificentissimis verbis faciunt.

Quam postulasti Urbem, obsequiumque nostrum, Rex Atila, ecce spontè deferimus, quando te amplissimum terrarum dominatorem, & terrorem gentium, divino Numine creatum intelleximus. Repugnantia cuncta proteris superbos deprimis, & difficillima quæque superas. Cedunt Atila omnia, & eò redacti sunt potentatus humani, ut beatus hac tempestate is dici queat, qui à tanto hoste ad faciendam deditionem exhortetur. Si tibi omnia jubente

bente fato cedunt, cedunt quoque Mediolanenses, & spontè se dedunt. Quod non modò necessitate imperante, sed impellente studio faciunt, ne destinatam è Cælo tibi gloriam remorentur, necè justum mox exitium subeant, pertinaciq; debitas pœnas expendant. Extrema namque temeritatis & stultiitiæ est, Divino nutui reluctari, factaq; intercipere, & præsertim tua, quæ vel in consideratissimo cuique nota esse debent. Illyricum, Mysias, Thraciam, Macedoniam, & Achaiam diripuisti, Rhætos & Noricos spoliasti. Germaniam cum universa Gallia, igni ferroq; vastasti, munitissimas Adriatici maris Vrbes evertisti. Istria, Venetia, & universa ferè Transpadana Gallia populata, fumat adhuc. Cateri Itali præ tanta trepidatione, caterorum exemplo deterriti, de relinquenda Italia decrevissent, nisi supero inferoq; mari, ac montium circumspectu occluderentur. Proinde ne victorie tuæ deesse videamur, Senatus Populiq; Mediolanensis nomine, Urbem, homines, & fortunas ultro dedimus. Et admodum erubescimus, quòd veluti Dominus pietissimus jam futurus, Nos officio prævenisti, & uti amicos, ne severitatem tuam experiremur, monuisti, ut deditiōnem continuò faceremus. Quare gratias Majestati tuæ semper habebimus, supplicantes quanto possumus affectu, quando de voluntate tua non veremur, ut edicto, milites cadibus, rapinis, cæteraque vi inhibeantur, focus & aris parcant, inviolatamq; matronarum ac virginum pudicitiam servent. Quòd si Majestatem tuam exorabimus, nunquam officio meritisq; vincemur. Non modò præsentis, verum etiam absentis tui imperium, summo studio viribusq; tuebimur, & in utraque fortuna tam gratum tibi semper obsequium præstabimus, ut pro peculiaribus socijs nos habendos esse censueris. Neque plus fidei in Hunnis, quàm in Mediolansibus planè reperies. Ne Majestatem quidem tuam dedecabit, Mediolani Regiam statuere, quam fecundissimam omnium officinam, omnes jure nuncuparint. Atque fidem nostram expertus, non minus hanc, quàm Sicambriam amabis, & excolendam esse reputabis. Quamobrem Urbem tibi dedissimam, Majestati tuæ non in-

non indecoram futuram, cum optimis auspicijs exoptatus adi. Accipe bono animo Cisalpine Gallie Regnum, Metropolimque dextro pede ingredere, non plus Divino, quam nostro iudicio nunc oblatam. Quam ut tanquam Regiam Patriamque sedem tractes, quando in tua manu omnia collocamus, iterum iterumque devotissime supplicamus.

Perorantibus Legatis, diversus Atila trahebatur, utrum potius faceret, an suavissimis verbis placatus, cū Civibus benigniùs ageret, an verba daret, Urbem mox aditam populaturus. Quum rerum opulentia, ab omni Regem humanitate diverteret, perfidia pudorem suscitabat, studiosa liberaq; deditio ab omni fraude vindicare conabatur. Tandem dū pudori ac utilitati suæ consulit, libenti animo hilariq; vultu deditionē factam se accipere ostendit, Civitatem cum fortunis incolumem præstiturū pollicetur, nil præter jus Imperij à Mediolansibus unquam petiturum. Expeditionem suam imperandi & non populandi gratiā fieri, seq; gloriæ, & nō prædæ causā militare significat, quorum alterum latronis, imperatoris contrā gloriosi esset alterum. Rapinas, cædes, & incendia in obstinatos & rebelles, jure quandoq; permitti. Proinde omnes bono animo esse jubet, spe simul & promissis onerat, indulgentissimum se eorum dominum futurum asseverans. Legati cum lætitia dimittuntur, omnia Urbi tuta ac integra fore nuntiāt. In sequenti die portas aperiūt, grato Hunnos animo excepturi. Princeps singulari pompā ingreditur,
Urbem,

Urbem, exercitus longissimo agmine per Urbem, transijt, in castris noctem ex edicto acturus, ne qua primo impetu vis cuiuspiam inferretur. Centuriones tantum & præfecti cum veteranis, & cohortibus Prætorianis, pro tutela Principis in Urbe permitti, totus ille dies in pompa & triumpho actus est. Postero verò cum Decurionibus Atila Urbem lustrat, pulchritudinem ac ædificia admiratur. Templum Jovis longâ religione celeberrimum perreverenter adit, ibique Jovi, Martique ritè litavit, omnia artium genera circumspicit, & obstupescit, atque ex his facultatum magnitudinem conicit. Reversus in Arcem, avaritiâ nimiam æstuarè coepit, secum recogitans, non ad exornandam, sed delendam Italiam venisse, imperium sibi in Pannonia statuisse, hac tantum Urbe totum Exercitum ditari posse; imò Mediolanensium vires illi formidolosæ videbantur. Quare dum se in sequenti die exercitum recensere velle dissimulat, clam per Præfectos legionum, & qui in Urbe pernoctaverant agit, ut dispositis per Urbem stationibus futurâ nocte incendia moliantur, Cives invadant, & omnia populentur. Quod ubi fieri coeptum est, acerrimè quoque totâ nocte pugnatum est, primores Urbis suis quisque præfidijs sese tuebantur. Ast ubi dies illuxit, postquam plebei passim direpti caderentur, & in multis locis incendia sævirent, Decuriones omnes partim capti,

partim cæsi, aliqui benigniorē nacti hostem magnā pecuniā redempti. Raptæ cum Matronis Virgines, tandem cædibꝰ & incendijs ex edicto finis illatus est; Multæ ingenuæ mulieres viris redditæ, populus deniq; advectis com meatibus aliquantulum ex illatis calamitatibus respiravit. Urbs quāvis graviter esset afflicta, non extremo tamen absumpta est incendiō. Atila se per edictum excusavit, id se invito ac incscio factum libidinem tantæ multitudinis & cupiditatem haud quaquam facile contineri posse.

Jam videant & agnoscant Christiani Populi, direptione Mediolani, quid juvit olim Antecessores nostros, Barbaris credidisse? & cū eadem nunc Orbi redeat fabula, sub alijs tantūmodo nominibus, alijsq; personis: discant serō nimis sapere, ac ruenti nunc Mahometo, trium Orbis partium Tyranno, fortiter & unanimes resistere. Illi inquam Tyranno, cui ferocissimi mortalium Scythæ famulantur, Bactriani & Parthi, Persarum quondam Victores: à quo florentissima, foedum in modum, conniventibus Christianis Principibus, direpta est Græcia, Macedonia, Illyricum, Dalmatia, Croatia, Sclavonia, Albania, Moldavia, Valachia, Servia, Bulgaria, Rhodus, Cyprus, utraq; Arabia, Armenia, Syria, Ægyptus, novissimè Hungaria cum Transylvania, uno verbo Asia & Africa occupata, Europa pessundata: & hi omnes

hines antea liberi & Christiani populi, Duce Mahometo inviti jam contra Christianum armantur nomen. Quanta Regum Populorūq; in nomen Christianum conspiratio? quantum foedus, & quanta Deus bone conjuratio? in qua omnibus lubet quod uni lubet; eoq; aeterna armorum & animorū societas creditur esse. Quæ longè differt à nostrorum Principum Christianorum foedere, in quo nationū, ingeniorūq; tanta dissimilitudo, & (si cætera desint) propria cujusq; utilitas dissensionem, mox & dissolutionem societatis adferre videatur. Gallia remotam se à periculis Turcici belli jactitat, hinc nihil minùs cogitat, quàm de bello Turcis inferendo: ignara, Turcas occupatâ Germaniâ, immani feritate brevi Luteciam invisuros, exēplo Atilæ, quem paulò ante debellatâ Moravia, subactâ Germaniâ, occupatâ Constantiâ, everfa Argentinâ, Galliam invalisse, pessundasse, ac evertisse meminimus. Non enim tunc cum solis Turcis, sed cum Oriente, & occupato magna ex parte Occidente, bellandū esset Christianissimis Regibus. Quantum enim Principibus nostris decedit virium & potentiæ, tantum accedit barbaro huic hosti. Qui ab extrema Arabia prodire ausus, jam in extrema Europæ parte victoriarum suarum trophæa, per summam Christianorum Principum ignaviam, nemine penitus contradicente, gloriosus

riofus explicat. Lego in Chronica Poloniae Pauli Piaſecij, circa Annum 1595. actum fuiſſe cum Polonia Republica, mediante Summo Pontifice Clemente VIII. de ſocietate belli contra Turcas, ſed irrito conatu. Referam genuinis verbis Hiſtorici, rem prout tunc agebatur.

In Polonia, à die 6. Febr. Cracovia Comitia Generalia Regni celebrabantur, illo præcipuè ſine, ut Ordines Summo Pontifici Romano, & omnibus Chriſtianis Principibus, ad ſocietatem belli contra Turcas ipſos invitâtibus, ſatiſfacerent. Tardius autem ad ea Legati Caſaris, Episcopus Olomuc: & Venceslaus à Bercha, venerant: unde incepto tractatu de modis ineunda ſocietatis huiusmodi cum Poloni certam pacem cum Turca ab annis 70. integrè ſervatam, non tam faciliè diſrumpendam vellent, niſi firmioribus præſidijs, belli ſuſcipiendi rationes ſtabilirentur, & Legati Caſaris, ad hoc mandata minus ſufficientia produceret: pleniora verò in tã arcto tẽpore à Caſare habere nō poſſet, negotium illud fuit rejectum ad Conventum Varſaviẽſem proximum, pro hoc ipſo tractando extra Ordinem indictum. Collecta tamen Agraria, ad omne caſum excipiendi belli Turcici, ab omnibus Ordinibus fuerunt conſeſſa. Iterum ſubſequenti Anno, videlicet 1596.

Major autem cura hoc anno, non ſingula tantum Regna, ſed univerſam Chriſtianitatem diſtinebat; quomodo communẽ hoſtem Turcam, acceptas proximo anno clades reſarcire contendentem, reprimerent. Et cum alij omnes Chriſtiani Principes, ſinguli domeſticis impliciti difficultatibus, nihil auxilij ad illud bellum conferre vellent, ſolos Poloros, qui tunc tranquilla undequaque pace florebant, Summus Pontifex, utiliore tantæ rei operã impendere poſſe ſperabat. Eò itq; omnia ſua conſilia converterat, ut iſtos in ſocietatem belli illius cum Imperatore colligaret: miſſo Legato ſuo à latere Henrico Cardinali Cajetano in Poloniam; ubi tunc tali ſine, Comitia Generalia Varſavia
Menſe

Mense Aprili celebrabantur. Miserat eò & Imperator Rudolphus Legatos suos; quorum precipuus, Ioannes Episcopus Vratislaviensis, magnificis perorationibus, & speciosis argumentis, persuadere adhibebatur Polonis illam societatem. Sed eadem dubia, quæ in antecedentibus Comitibus illum tractatum interruperant, tunc quoque Poloni opponebant: nempe vinculum societatis cum Papa & Imperatore, firmum haberi non posse: cum morte eorum facile rumperetur, quò moles belli universi in Polonos solos recumberet. Sed si Ordines Germania quoque ad eandem societatem accederent, & de manutenendis societatis conditionibus Polonis carerent, eam firmiori robore coire, atque consistere posse: ac tali demùm securitate, certā pacem cum Turca periculo belli socialis, Polonos pro bono Reipublicæ cōmutare non detractare. Nulla autem habebantur ad hoc mandata ab Ordinibus Germania; & cum Cardinalis Cajetanus pro illis fide jubere vellet, ac in se recipere praeferret, quò ducturus esset Germania Electores, ut pactis & fœderi, quò tunc stabilitum fuisset, illi quoque subscriberent, silentio fuit explosa illa præsumptio. Quisque enim prudētior facili judicabat, Cardinalis auctoritatem non eam fuisse, ut obtineret à Germanis Principibus, quò Imperator toties repetitis precibus emendicare nō poterat. Requisierat Pontifex & Regem Hispania, ut ipse Polonis, pro conditionibus istius societatis sese obligaret: sed & ille majores difficultates opposuit. Unde cum constitui non possent solida fundamenta, quibus societas talis subsisteret, tractatus illius tunc evanuit. Spontè tamen citrà obligationis debitū Poloni promiserunt, quòd essent prohibitori transitū Tartarorum in Hungariam, & quòd iustum exercitum in consinijs tenerent, quò Turca suspitione ab ea parte periculi distineretur.

Hæc summa redditæ responsi Poloniæ Procerum: Christianorum Principum adversus Turcam jure meritò ridentium societatem. Certum enim est, nec historijs probari debet, toties inceptum fuisse fœdus Christianorum, toties omissum. Quis occupatā per Turcas Constantinopoli, non illicò Græciæ spo-

ciz spondisset ad futura Christianorum auxilia? & tamen nunquam illa comparuerunt. Consternati equidem ad momentum finitimorum animi erant, sed haud multò post obliuiscabantur eorum, quæ paulò ante timebant. Solus Nicolaus Pontifex sacrosanctæ militiæ saluberrimum promulgauerat tunc Edictum, multis quidem Germanis, paucis verò reliquis Europæis accurrentibus: quorum virtute, Capistrani sanctitate, Corvini fortitudine, servata tunc fuit Alba. Cujus oppugnationē æternâ memoriâ dignam, Bonfini verbis hîc adnecto.

A Turcis interim Alba obsidetur, quod Idibus Juniis accidisse ferunt. Vrbs est in angulo sita, ubi Danubio Savus illabitur: à Septentrione Danubio, ab occasu verò Savo abluitur. Arx monti præsidet, loco & arte munitissima: ad radices montis Civitas in amnis utriusq; ripas effunditur: crasso muro confluentibusq; obfirmata: à continēte duplici vallo, fossâ, mænibusq; munitur. Mahumetes in duo castra exercitum dividit: altera præter Savum, quibus Basseus Asiæ: altera præter Danubiū, quibus ipse præerat, ritè locat. In suis castris tormenta tunc bellica à fronte disponit, locum vallo fossaq; circumvenit, ne eruptionib⁹ hostium foret obnoxius. Reliquam multitudinem per campos effundit, quæ omnia complere videbatur. Quum à continente continuatis serè castris Urbem obsedisset, nè quid efferri inferrique possent, Savum & Danubium classe compleverat. Cum expugnatio Civitatis insanam machinarum magnitudinē postularet, ac illæ ob itineris difficultatem facilè trahi non possent, hoc barbarus animus commento usus est: machinas diffregit, antequam iter iniret, ut in levia frustra redactæ, facilius per ardua loca veherentur: Mox ubi in Mysiam superiorem ventum est, ad Chrysonicum, statim è conflato ære instauravit: quas

quas quum urbi propius admovisset, & munitionibus quibus opus erat | obfirmâisset, mox oppugnationem adoritur; quatit die noctuque mœnia, nihil oppidanis otij indulget. Corvinus & Capistranus Urbem acerrimè dudum obsessam esse sentiunt, classẽ Hungaris Crucesignatisq; completã, secundo amne deducunt, ut Albanam Arcem aquã terrãq; obsessam factò impetu ingrediantur. Quum appropinquavêre, Urbem assiduò quati, Arcem jactis in altum lapidibus sublimi, Regionem sulphureo latè fumo caligantem, perpetuas serpare tenebras conspiciunt. Sociorum miseratione correpti, qui acerrimã obsidione torquebantur, animos ingentes sanè concipiunt, & ad certamen irritantur. Trecenti è Polonis erant, qui religionis ardentissimæ gratiã, sumptã Crucis tesserã, stipendia faciebant: item Germanorũ ingens numerus, qui sacram expeditionem ultrò susceperant, & certatim utrique obsessis accurrendum esse censebant. Tormentorũ crepitus æneorũ, ad Segedinum usq; exaudiebantur. Quare instructã classe, terrestribusq; copijs in aciem educis, secundo amne descendũt. Mahumetes his occurrere ausus, suam classẽ opponit, nè quid laboranti Civitati afferant subsidii. Collatis in Danubio signis, fluvialis pugna confertur. Effertur immensus utrinque clamor, & crepitantium fragore tormentorum Danubius intonat, ac utriusque classis gravitate subgemit. Christiana in quadratum agmen effusa, ripam utramque legebat. In ripis quadrata cataphractorum equitũ agmina, utrumque classis cornu protegebant: in dextro Corvinus, Capistranus in lævo præsidere. Hic à prora Crucifixum amplexus, ac supplex ad salutare prælium suos hortari, promittere Divinã opem, & prophanis hostibus maledicere. Corvinus acerrimè pugnare, ac exemplo suo, ad pugnã Hungaros incendere, jubere ut remis incumbant, & suffragante Danu-

Danubio cominùs dimicent. Quod ubi factum est, mutuis navigia catenis utrique colligant. Corvinus in Prætoriam navem iniliit, sequuntur socij, enses latè ducunt, Turcasq; faucios seminecesq; in Danubium deturbant, idem reliqui faciunt. Fervens ubique colluctatio cernebatur, multi utrinque cadunt, & quum dirà se omnes cæde competerent, cruore Danubium totum inficiunt. Quum secundi amnis subsidio nostri niterentur, Turcarum classem inclinant, caduntq; . Illi obstanti fluvio cedere coacti proras avertunt; multa inter fugiendum intercepta navigia, undisq; demersa, cæteri ad suorum præsidia confugere. Corvinus fusâ fugatâq; classe, quum Albæ appropinquasset, eam referat, Urbemq; ingreditur, quam armis, milite, commeatibusq; complet; faucios, ægrosq; oppidanos educit; Arci supplementũ suggerit validissimum: obsessorum animos recenti victoriã instaurat, & ad propugnandam Civitatem unâ cum Capistrano Viro sanctissimo omnes hortatur. Mahumetes ad nuntium profligatæ classis, quamvis gravius (inquit) nostro tamen voto omninò potiemur. Quod è classe superfuit, incendi jussit, atque obstinatissimum ad oppugnandam Urbem animũ intendit. Quum paterni sibi amici retulissent: Amurathem olim septem in Albana obsidione menses trivisse, ac irritò tandem conatu abivisse: multis paternos manes probis affecit, & ante quintumdecimum se diem Vrbe potiturum gloriatus est. Basseus fortè aderat Asiaticus, hic ut glorioso Principi magis assentaretur, certam imminere victoriã pollicetur, quando Byzantium ipse vi cæperit, veteri arte ac munitione quaqua maximâ præditum: neque ab Hungaris validius muniri, magisq; strenuè protegi, quàm à Græcis oppida soleant: quibus non immeritò non solum eloquij, sapientiæq; , verum etiam disciplinæ militaris gloria suo jure tribuitur.

buitur. Præterea multæ dirutæ turrës, completæ fossæ, & jam æquata solô mænïa forent: proinde haudquaquam diffidendum esse affirmabat. Mahumetes his verbis accensus, in sequenti die omnes arma sumere jubet, ac veluti decreverat, nunquam etiam cessare constituit, donec Albâ potiatur. In tot Ordines digerit exercitum, ut perpetuū prælium continuare, & ita fessâs subinde acies instaurare possit, uti nullâ quiete datâ oppidani deficere cogerentur. Sacer Divo Sixto erat ille dies, octavo Idus Augusti, quo deturbâtis dudum propugnaculis, ruderibus cõpletâ fossâ, & obtutis patentibusq; mænibus, hostes in occasu solis, Urbem adoriûntur. Obstant oppidani, & quum completos innumerâ multitudine campos ab arce prospectarent, constrataq; latè mænïa cernerêt, salutem desperare cogebantur. Nulla major spes & consolatio succurrebat, quàm desperatâ corporum salute pulcherrimè mori. Joannes cum Divi Francisci Collegio, Crucigeros ad salutarem pugnâ hortatur, & Servatoris nostri Crucem amplexatus, ac suplex, Dei præsentiam opemq; pollicetur. Illi appetere magis, quàm formidare gloriosam mortem visi, ad pugnâq; promptissimi Turcis occurrunt. Vnum his oberat, quòd animo potius quàm corpore armati erant: Gladijs tantum & lanceis obnitebantur, pauci se galeâ & thorace protexerant. Dira nimis & cruenta suprà mûrorum ruinam pugna confertur, summâ vi utrinq; pugnatur. Hostilis clamor, tympana, classicaq; Cælum sonitu & fragore complebant. Rudera magnâ cæde sædantur, quando illi vi ingredi, reiicere isti connituntur. Corvinus ubicunque laboraretur, accurrens nunc verbis nunc factis omnib⁹ opem suggerit: timidis & ignavis inclamitat corripitq; strenuos extollit: fortissimos quosq; comendat & hortatur, ut Urbem hanc Christianæ Reipublicæ propugnaculum fortissimè tueantur:

D

antur:

antur: sciant sibi cum his rem esse, quos toties olim profligarent, vicerint, & ad internecionē sæpè ceciderint; & in Danubio tot superiore pugnâ cōfecerint: non deesse Divinum auxilium, JESU Christi præsentiam, sub cujus nomine, ductu, auspicijsque dimicatur. Mox cum globo veteranorum instructus, usquequaque discursare, instaurare Ordines, professis validos, vivos pro mortuis, pro sauciis integros, pro inermis armatos, veluti opus erat, sufficere: quandoque ubi plurimum laborari sentiebat succurrere, inter confertissimos sese hostes inferere, ingressos reiicere hostes, & Imperatoris militisq̃ optimi officium præstare. Contrà Mahumetes à tergo suis instare, grandia militibus præmia polliceri, retrocedentes revocare in ordinem, & quandoq̃; falcato ense cedere, orare ut strenuè pugnent. Exclamans eam jam Urbem captum in, & suos intra penetrâsse: proinde ut factò magno agmine progredierentur, hortari. Variante diu fortunâ pugnatum est, quando Turcæ sæpè in Urbem penetrârunt, & à Christianis non sine magna utrinque cæde rejecti, supra cadavera, murorumq̃; ruinas, diu nutante ancipitique victoriâ dimicatum. Ex hinc veluti spes utrinque surgebat, ita extremis indefessisq̃; viribus pugnabatur. Sæpè Turcæ cum maximo impetu in Urbem irruerant: sæpè etiam rejecti, aridente subinde Marte, instaurato cuneo, amissam obstinatissimè victoriam repetebant. Itaq̃; cum pari spe utrinque pugnaretur, Mahumetes præsentaneum consiliū inquit, quam validissimo potest agmine in Urbem irrumpere, pertinacissimèque tenere. Quod si nequeat, hinc rejectum, fugam simulare, quâ oppidanos allectos in campos educat, mox irrumpere à tergo dimissâ equitum multitudine reditum interceptat, uti à tergo & fronte, Christiana gens juxta cœdatur; quare validissimum agmen instaurat. Superatâ mortuorum
strue,

strue, quæ in ruinis excreverat, in Civitatem inclinatis oppidanis irrumpit. Penetrat in forum, & in medio foro prælium redintegratur. E Turcis plerique in forum signa inferunt, altis nonnulli turribus vexilla Regis deponere conantur, quæ adhuc in mænibus integrè supertuerant: subeuntem cum vexillo Turcam memorant, qui ut signa sui Regis, ad irritandos in Urbem sociorum animos, qui nondum intrò penetrarant, pinnaculo turris imponderet, & ad exanimandos Christianos Vngarica deturbaret, turrinè altissimâ repentè subit. Hunc Vngarus illicò subsequitur, ac antequam patria signa deponeret, cum hoste in turris fastigio colluctatur. Quum alio modo id prohibere non posset, se cum Turca quem apprehensarat, ex altissimo vertice præcipitem dedit. Corvinus in summum periculum adductam Urbem conspiciens, accito Michaële Zilagio Avunculo suo, & Ladislao Canisâ, item Sebastiano Rosgonio, cæterisque fortissimis Proceribus Vngarorû, ab Arce ruens, in forû Turcas inclinat. Hi tanto furorè congregiuntur, ut multis in platea vicisque cæsis, extra mænia extemplò hostes rejecerint. Crucigeri Divinâ se opè adjutos rati, adauctis animis extra mænia prodeunt, & in hostes sævâ cæde grassantur. Mahumetes ubi se iterum iterumq; rejectum esse cernit, extemplò fugam simulat, & plane terga vertit, ac eos educit. Instant à tergo Crucigeri, & arridente victoriâ pellekti, pertinaciter insequuntur. Jamq; ad Bassei Asiaticj castra pervenerant, quæ in Savi ripa collocarat: Capistranus prospectis ab Arce Mahumetis insidijs, confestim suos revocat ut retrò cedant. Quum præ strepitu & tumultu magno exaudiri non posset, à tergo receptui signa dat: contra illi victoriæ intenti nihil exaudiunt, hostilia castra adoriuntur & incendunt. Pater cum Sacerdotum collegio, illuc per medios enses ab arce decurrit, revo-

catque. Mahumetes qui ad machinarum bellicarum munitiones confugerat, quum Bassi castra cremari diripi; respueretur, cum equitatu, quem à tergo reliquerat, ut reditum oppidanis obstrueret, eò succurrere contendit. Ad hæc jam dies inclinabat. Corvinus desertas à Mahumete munitiones, & bellica tormenta conspicatus, cum sociis ex Vrbe prorumpens, repente capit: machinas æneas adacto mox clavo, partim obstruit, inutilesq; reddit, partim in hostes convertit, intenditque. Turca rejectis è castris Crucigeris, qui à Capistrano revocati facile cesserant, ad munitiones redit: eas à Corvino occupatas comperit. Quum instanti crepusculo, recuperandi gratiâ prælium instauraret, obversas in se machinas invenit, à quibus cum gravissimè socij læderentur, ingruente nocte, se in posteriora castra, non sine sæda fuga recepit. Alij pectore faucium sub papilla, in castra pedem retulisse memorant. Corvinus munitionibus potitus eas incendit. Quum imminente nocte, machinas æneas exportare non posset, oclusis foraminibus irritas præstitit, victorque ac ovans in Urbem redijt. Turca, ut se ab Vrbe sæpe rejectum, & Asiaticis castris ac munitionibus exutum conspicatur, intempestâ nocte versus Macedoniam iter intēdit. Referunt nōnulli, cum sagittâ faucium seminecēq; in castra relatum aliquantisper jacuisse. Turcas ad Sarnon oppidum motis hinc castris Imperatorem transtulisse; Veritos, nè intercedente ipsius morte, postero die ad internecionem caderentur. Ad Sarnum, quum ille aliquantulum respirasset, de belli exitu fuisse percontatum; quum illi respondissent, Bassium Asiaticum, & cunctos ferè Proceres oppetiisse, magnam partem exercitus esse cæsam, Kurkutoam Prætorianarum cohortium Præfectum, sub mænibus fuisse trucidatum: item munitiones omnes ab hoste captas. Ad hæc, hominem

(aju-

(ajunt) usque adeò ingemuisse, ut venenum præ vitæ molestiâ propinari sibi jufferit: quod quum amici recusarent, timidum & demissum, incensis castris turpem arripuisse fugam: neque tam elatum animo venisse, quàm consternatus abiit: & qui se Terrorem Orbis edixerat appellari, à parva manu fufum fugatumq; fuisse. Basseum Asiæ, cui Caraciæ nomen erat, ad munitiones, paucis ante dieb⁹ ad Urbem ictum obijisse plerique ferunt. Sexto igitur & quadragesimo obsidionis die, Divinâ potiùs, quàm humanâ ope, Vrbs Albana, Turcarû manibus liberata. Quanquam multi utrinque cecidissent, plurimi tamen è Tureis occubuere: multi quadraginta hostium millia periisse prodidere: viginti millia nonnulli: nec defunt, qui quatuor tantum millia fuisse affirmant. Sed quanta clades illa fuerit, potentissimi Regis fuga testatur. Turcæ quoq; ingentem & incredibilem fuisse minimè diffitentur: quin & Deorum ex se plures, quàm Christianorum manu, eo die cæsos fuisse asseverant: quia multa mortuorum corpora, sine vulnere comperta fuere, quæ Divinâ potiùs quàm humanâ vi cecidisse reputabantur.

Hinc cognoscant Christiani Principes, rem nobis nunc esse, non cum imbelli aliquo hoste, sed cum Regnorum, Provinciarum, fortissimarumq; Urbiû Victore, triumphatore Turca: qui quinquagesimo obsidionis die, Constantinopoli (terrâ & mari Victor) potitus est: illo inquam Turca, cui fortissima, liberrima, ac nullius unquam jugum ferre solita ad extremum cessit Pannonia: tot invicti, ab eodẽ prostrati ac debellati Heroës, Cæsares, Reges, Principes, Duces. quorum sanctissimi manes, ultricẽ aliquando Prin-

do Principum Christianorum exposcunt dexteram. Armâ Viri, fertê armâ Vivi, cûm vinci posse Christianos Principes & Populos tot jam Bârbari ostenderint. Post Hérulos, Gotthos & Hunnos, Otthomanidas timeat Roma: post Odoacrem Theodoricum, & Atilam (fatale aliàs Europæ nomen) nûc regnantem Mahometem formidet Europa; & imprimis Germania eheu nimium vicina Hungariæ: timendus ille non esset, si Principes Imperij concordēs ac unanimes essent, & armâ omnes tandem uno nutû, uno voto, uno fine arriperent; Orbis commune negotium acturi. Ita enim fieret, ut inito cum vicinis Regibus stabili foedere, liberarent Tyrannide mundum, superstitione Ecclesiam, infamiâ sæculum. Romani enim Imperij est, exequi quod in salutem humani generis DEUS Opt: Maximus ordinavit. Cadet Bâbylon, cadet Bâbylon, si tam fortiter aggrediemur immanem, hanc Belluam, quàm feliciter ille nos proterit: bello enim & Marte non Legationibus, aut muneribus res peragenda est: cûm indignum sit Christiano nomine Infidelium bella potius redimi, quàm perfici, hostemque precio non armis submoveri. Nec tractatibus aut foederibus fidendum: omnia enim foedera Turca ac Tartarus utilitati propriæ accommodat, contagiosis velut Basilisci oculis Christianorû uterq; obser-

servans commodam, tam benè everfurus Orbem,
quàm olim Atilam. Cujus exemplo & hiftoriâ ad-
moniti Principes difcant:

Barbaris nullo unquam tempore fidem
servandam effe.

F I N I S.



f. 2.

...commodi et tam bene evolutus Oribasius
...et alii. Atque hunc exemplum de hisce ad
...et Tiberius dixerunt:
...Barbaris etiam in eodem tempore fidem
...servandam esse.

1. 1. 1. 1.



BIBLIOTHECA
UNIV. IAGELLONICAE
GRACOVENSIS

